

Sikũn Ximotre Pawre kot Ximotre hwỳr wam kagà nẽ mẽn̄h kõt hõ mẽn̄h

Pawre na pre kagàja nhĩpêx. Na pre Jejus kwỳ h̄kêt xwỳnhjaja Jejus ã unê nẽ krĩ pẽ Rõm kamã haxà nhũm arĩ hkrĩ ho hkrĩ. Tã ra mẽ kot hpĩr kaxyw nhũm Ximotre mã kagàja nhĩpêx nẽ hwỳr kumẽ. Na pre Ximotre Pawre h̄kõt pa ho pa hã mytwrỳ xohtô nẽ. Tã hpãnhã krĩ pẽ Epes kamã arĩk nẽ Tĩrtũm kapẽr o Jejus kõt hkwỳjê jahkre ho ri mẽ h̄kõt pa. Jakamã nhũm Pawre kagàja nhĩpêx nẽ kamã kãm mẽmoj tã karõ nẽ hwỳr kumẽ. Nẽ nhỹrmã mẽ kot Pawre pyrà nẽ Jejus ã hpĩr mã htã tee ri amnhĩ kukamã hamaxpẽr kêt ã kãm karõ.

Nẽ mẽ hkwỳjaja kęp Tĩrtũm kra hã amnhĩ jarẽnh tã nhũm Pawre Tĩrtũm kãm hprãm xà kuhpa hã mẽ kot tanhmã amnhĩ nhĩpêx to ho pa hã Ximotre mã mẽ harẽ. Kot mẽ harẽnh mar nẽ Jejus kwỳjê nẽ mẽ omunh mex o pa kaxyw. Nẽ Ximotre kot Tĩrtũm kãm hprãm xà kot pix mã amnhĩ nhĩpêx o pa hã kãm karõ. ã na pre Pawreja Ximotre mã mẽmoj tã karõ kamã hihtỳx nẽ hã kagà nẽ hwỳr mẽnh anẽ. Nẽ kãm:

¹ Pa Ximotre? Xà amex? Ixpê Pawre na pa amã ixkapẽr nẽ hã kagà nẽ awỳr kumẽ. Ixpê Jejus nhỹ hã hkwỳjê jahkre ho ixpa xwỳnh na pa. Tĩrtũm na pre ja kaxyw ixãm. Tĩrtũm Kra Jejus Krisja kot puj mẽ pahpẽ hkwỳjaja nhỹrmã kukwak ri pamex kumrẽx nẽ pahĩr tũm nẽ ri papa ho papa.

Pawre kot Ximotre ho Tirtūm mẽ Jejus wa hwỳr ã harēnh

Atre 16.1-2

²⁻³Te apê ixkra pyræk Ximotre. Jakamã na pa hte ato Mēpanhĩpêêxà maati Tirtūm mẽ Pahihti Jejus Kris wa hwỳr rãhã ho ri ixpa. Na pa hte mẽ pakukamã mẽ panhĩgêt pyrà nẽ tãm ijamaxpēr o ixpa pê Tirtūm mã tanhmã amnhĩ nhĩpêx to ho ri ixpa. Jakamã na pa hte ato Kra Jejus mẽ wa hwỳr rãhã ho ri ixpa. Arĩgro hã nẽ kamát kãm amã ijamaxpēr nẽ ato wa kuwỳ nẽ wa kãm:

—Pa Tirtūm mẽ Pahihti wa. E ixte ixkra puro Ximotre ho war awỳr kaxyw war amã ijamaxpēr. Na ka hte wa ho mex nhũm war akôt amnhĩ nhĩpêx mex o pa. Te õ wôwô mẽ katorxà wa kot amnhĩ nhĩpêx pyræk. Na pa hte kot amnhĩ nhĩpêx o paja mã ijamaxpēr nẽ ÿ hã ixkĩnh nẽ. War ate kamã axukaprĩ ho ri apa kaxyw na pa ho war awỳ. War ate kutã war anojarêt rãhã ho ri war apa nhũm hamakêtkati nẽ àmnhĩx ri pa ho pa kaxyw. Anẽ.

Pawre kot Ximotre nhỹ hã hkĩnh ã harēnh

⁴Nẽ na ka pre hte ixkôt ixto ajuta ho ri ixkôt apa htã pa pre nhỹhỹm inhnojarêt nẽ axtem axàpênh õ hã amã karõ hãmri nẽ Epes kamã are nẽ ma mō. Ka amã ijapê xàj tee ri ma inhmōr ã ixpumu nẽ amỳr rax nẽ. Na pa hte arĩ ja hã inhnohtỳx nẽ ri ho ixpa Ximotre. Jao ra ato ama nẽ. Tã kot puj nhỹrmã axte axpên pumu nẽ pahkĩnh tỳx nẽ.

⁵Nẽ na pa hte akatorxà Enĩtre mẽ anhõ wôwôre Rojti wa kãm ijamaxpēr rãhã ho ri ixpa. Na pre wa kumrêx amnhĩ kaxyw Jejus kôt hamaxpēr nẽ hkôt amnhĩ xãm. Tã ka wa hkanrêhã wa uræk nẽ ã amnhĩ nhĩpêx anẽ. Ixte ja hã apumunh mex. ⁶Na

pa pre ate tanhmã Jejus mã amnhĩ nhĩpêx to ho ri apa kaxyw axãm kaxyw anhĩmõk ã inhĩhkra xi nẽ ato Tĩrtũm wỳ. Kot tanhmã akrã hto nhũm ate Karõ nhỹ hã tanhmã amnhĩ nhĩpêx to ho apa kaxyw. Tã kêr ka arĩ ã kãm amnhĩ nhĩpêx anhỹr rãhã ho ri apa. ⁷ Na pu htem Tĩrtũm Karõ nhỹ hã pamã ma ho papa hkêt nẽ. Na pu htem ỹ hã pamã mẽ piitã mẽ hkĩnh pẽ paxãmnhĩx tanhmã mẽ ho ajuta hto ho papa. Nẽ ỹ hã kapêr o mẽ ahkre htỳx o ri mẽ hkôt papa. Nẽ mẽmoj punuj kutã amnhĩ to htỳx rãhã nẽ. Jao amnhĩ to mex pix nẽ.

⁸ Jakamã kwa kêr ka amã mẽ kãm Jejus jarẽnh o apa pymaj tee ri amnhĩ kukamã ajamaxpêr kêt nẽ. Nẽ mẽ kot Jejus ã ijaxàr nhũm arĩ ixkrĩ hã ijarẽnh ma nẽ mẽ kot ixkuxwar ajaxàr pymaj mẽ kãm Tĩrtũm kapêr o mẽ ahkre hkukamã tee ri ajamaxpêr kêt nẽ. Mẽ kot ã anhĩpêx anhỹr mã tã kêr ka amnhĩ kamã akahak kêt nẽ. ãm Tĩrtũm nhỹ hã hihtỳx xà ho amnhĩ to htỳx nẽ ixpyrà nẽ ma mẽ kãm Jejus kot mẽ panê tanhmã amnhĩ nhĩpêx to hã harẽnh to rãhã ho ri mẽ hkôt apa. Mẽ kot tanhmã hã anhĩpêx to htãã. ⁹ Na pu htem Jejus kôt amnhĩ xunhwỳ nhũm Tĩrtũm ja hã mẽ pahpumu nẽ Jejus kukwak ri amnhĩ katut kôt mẽ pahte amnhĩ tomnuj piitã rẽnh pa nẽ mẽ pahto hkra. Hãmri nẽ mẽ pahte hkôt pix mã amnhĩ nhĩpêx o papa kaxyw mẽ paxunhwỳ. ãm Jejus pix kukwak ri na hte mẽ pahto hkra nẽ ã mẽmoj to mẽ pakutã nojarêt rãhã ho pa anẽ. No na hte mẽ pahte amnhĩ to mex ã mẽ pahpumunh kôt mẽ pahto hkra hkêt nẽ. Amnepêm kormã mẽmoj piitã hkêt ri na pre mẽ pakukamã hamaxpêr o:

—Koja mẽ nhỹrmã Ixkra Jejus Kris kôt amnhĩ xunhwỳ pa ja hã mẽ omu nẽ Ixkra kukwak ri mẽ ho mex nẽ. Anẽ.

¹⁰ Tã kormã mẽ pahte amnhĩ tã ã kot mẽ pa-jarẽnh anhỹrja mar kêt jakamã na pre Jejus mẽ pahwỳr wrỳ nẽ tanhmã mẽ pahto mex to. Na pre ty nhũm Tĩrtũm akupỹm ho htĩr. Jakamã na pu htem ra amnhĩ kaxyw hkôt pajamaxpẽr nẽ hkôt amnhĩ xunhwỳ hãmri nẽ nhỹrmã mẽ pahtyk tã nhũm Tĩrtũm kot Kra Jejus nhĩpêx pyrã nẽ akupỹm mẽ pahto mẽ pahtĩr pu mẽ Jejus kukwak ri wa kuri pamex nẽ pahtĩr tũm nẽ papa ho papa. Jakamã na pu htem mẽ pamã pahtyk pyma ho papa hkêt nẽ.

¹¹ Amnepêm na pre Tĩrtũm ixãm nẽ tanhmã inhmã ixàpênh ã karõ hto nẽ inhmã:

—E Pawre kêt ka Jejus nhỹ hã ma hkwỳjê jahkre ho ri mẽ hkôt apa. Nẽ ixkapẽr o mẽ ahkre mex nẽ. Kêt ka ã amnhĩ nhĩpêx anhỹr rãhã ho ri mẽ hkôt apa. Anẽ.

¹² Tã ã kot inhmã kapẽr anhỹr nhũm ixte kapẽr kôt amnhĩ nhĩpêx o ixpaja mỳrapê na htem Jejus ã tanhmã inhĩpêx kati hto ho pa. Pa hte ixpunuj nẽ amnhĩ xà htỳx kamã ijamak o ri Jejus mã tanhmã amnhĩ nhĩpêx to ho ri mẽ hkôt ixpa. Tã nom tee ri ja hã amnhĩ pumu nẽ amnhĩ kamã xpijaàm nẽ ixkaprĩ hkêt nẽ. Ixte amnhĩ kaxyw hkôt ija-maxpẽr xwỳnhja na ixte tanhmã kot amnhĩ nhĩpêx to hã omunh mex jakamã kot paj ty nhũm mẽ arĩ inhmỳr pê Tĩrtũm kapẽr mar o pa. Mẽ kot ja hã xpir tã koja mẽ apê Kris kôt ixkwỳjaja inhmỳr pê arĩ mẽ kãm harẽnh o apa. Koja mẽ ã axpẽn mỳr pê amnhĩ nhĩpêx anhỹr o pa rãhã nhũm Pahihti Jejus akupỹn mẽ pahwỳr wrỳ.

13 Kwa Ximotre. Ra ixte amã mẽmoj tã karõ rax jakamã kêr ka mar tỳx nẽ hkõt amnhĩ nhĩpêx rãhã o ri apa. Jao Jejus Kris nhỹ hã mẽ piitã mẽ noo mã amnhĩ kaxyw kãm ajamaxpêr tỳx rãhã nẽ. Nẽ mẽ piitã mẽ ho mex o ri apa. ¹⁴ Ate mẽ kãm tanhmã Jejus jarênh to ho ri apaja ãm hãmri na. Tã koja mẽhõ htỳx ri tanhmã ho kapêr punuj to rỳ axtem nẽ tanhmã harênh to ka ja hã ama nẽ nẽ kãm akapêr kãm axihtỳx nẽ. Tĩrtũm Karõ ra kot akarõ hwỳr àr jakamã kêr ka ý hã ã Jejus jarênhja jamãr mex o ri apa anẽ.

*Pawre kot tanhmã amnhĩ jarênh to
Sikūn Ximotre 4.16-18*

15 Nẽ mãn ka pre ra pika pê As kamã Kris kwỳ kot ixkaga hã mẽ harênh ma. Na pre Pijerti mẽ Emosti mẽ mẽ ohtõ nẽ tanhmã hamaxpêr to nẽ ixto ajuta hkêt nẽ. ¹⁶⁻¹⁸ ãm Oněsipti pix na pre mẽ kurom ijarênh ma nẽ man ixwỳr Rõm wỳr mõ nẽ ijapêr o ri mẽ hkõt mra nẽ ixwỳr kato. Hãmri nẽ xatã ixwỳr mra nẽ tanhmã ixto mex to. Jao akupỹm ijamaxpêr o hihtỳx. Ixpê prês nẽ ixkrĩ htã kệp ixkràmnhwỳ hã amnhĩ jarênh ã hpijaàm kêt nẽ. Nẽ amnepê m kormã krĩ pê Epes kamã ixpa ri na pre mããnẽn tanhmã ixto mex to ho pa. Tã ã kot inhĩpêx mex anhỳr o pa jakamã na pa hte ho Pahшти Jejus wỳ nẽ kãm:

—Pa Pahшти? Oněsipti o na pa awỳ. Kot ixto mex rãhã ho pa jakamã kwa kêr ka ixtã omu nẽ kutã anojarêt rãhã ho apa. Nẽ õrkwỹ kamã hkwyjaja mããnẽn tanhmã mẽ ho mex to. Hãmri nẽ nhỹrmã akupỹn mẽ ixwỳr wrỳ nẽ ixtã kamã axukapĩ hã tanhmã ho mex to. Anẽ.

2

Mě pahte Jejus kôt amnhĩ nhĩpêx pix prãm ã mẽ pamã karõ

Wam Ximotre 6.11-16

¹ E Ximotre. Jejus Kris kot mẽmoj to mẽ pakutã nojarêt rãhã jakamã kwa kêr ka ÿ hã amnhĩ to htỳx nẽ kãm tanhmã amnhĩ nhĩpêx to ho apa hã amnhĩ kamã akahak o ri apa hkêt nẽ. ² Ra ate pa tanhmã Tĩrtũm kapêr o mẽ ahkre htoja mar jakamã kêr ka amnhĩ xõ ri ã Jejus kôt mẽ pahkwỳjê jahkre ho apa anẽ. Mẽ kot amar nẽ pahpyràn axpẽn xõ ri ho axpẽn jahkre ho pa kaxyw.

³⁻⁴ Sõrdat na htem mẽ hkrãhtũm kãm prãm xà hkôt tanhmã amnhĩ nhĩpêx to. Jao tanhmã kute htã kapêr ma nẽ hkôt amnhĩ nhĩpêx. Tanhmãn à rỳ kãm prãm rỳ tanhmã omnuj to htã kutã amnhĩ to htỳx nẽ mẽ hkrãhtũm kôt amnhĩ nhĩpêx. Na htem amnhĩ xàpênh kukamã tee ri hamaxpêr o pa hkêt nẽ. ãm mẽ hkrãhtũm kapêr kôt pix mã amnhĩ nhĩpêx o pa hprãm. Tã kêr ka mẽ uràk nẽ Pahihti Jejus kôt amnhĩ nhĩpêx rãhã ho ri apa hprãm. Mẽ kot hã tanhmã atomnuj to htãã.

⁵ Nẽ mẽ hprõt tỳx xwỳnhjaja na htem hkwỳjê pẽ amnhĩ to wa hprãm xàj ãm ja pix kukamã hamaxpêr. Hãmri nẽ hprõt tỳx prãm xàj mẽmoj kot mẽ ho hirerek kêt nẽ amnhĩ jagri htỳx nẽ. Hãmri nẽ hprõt tỳx o hkwỳjê jakre nẽ amnhĩ to wa nẽ pøj nẽ kot amnhĩ to wa hã mẽmoj to kãnja. Tã kêr ka mẽ uràk nẽ amã Pahihti Jejus kot amnhĩ nhĩpêx kôt pix mã amã amnhĩ nhĩpêx prãm.

⁶ Nẽ pur kãm mẽ àpênh xwỳnhjaja na htem mẽ hpur kãm àpênh pix tãnopxar o pa nẽ àpênh rũnh

ně. Kām kaga hkêt kām àpênh o pa. Tã àpênh rûnhja kukwak ri ihpur kām ò rûnh ně ho apkur mex o pa. Nom koja mẽ kām kaga ně àpênh mex kêt ně hāmri ně ò grire ně apkur mex kêt ně. Tã kêr ka pur kām mẽ àpênh rûnh xwỳnhjê pyrà ně Pahihti Jejus mã amnhĩ nhĩpêx mex o apa. Nễ mẽ uràk ně amã kaga hkêt kām axàpênh pix tãnopxar o ri apa.

⁷ E na pa ã ajahkre aně Ximotre. Tã kêr ka ixte ajahkreja ma ně kām ajamaxpêr rãhã ně. Koja Pahihti tanhmã akrã hto ka aprĩ hã mar tỳx ně.

⁸ Nễ kêr ka Pahihti Jejus Kris mã ajamaxpêr rãhã ho ri apa. Na pre katorxà hkôt kêp Pahi finat Tawi kanrêhã htãmnhwỳ hã mẽ pahpyrà ně ĩ ho ĩ ně kato ně panhõ pika kamã pa ho pa. Tã nhũm prem kupĩ nhũm amnhĩ xà htỳx kamã hamak kām ty. Hāmri nhũm Tĩrtũm akupỹm ho htĩr nhũm akupỹm htĩr o htĩr. ã na pre hte harênh anhỹr rãhã ho ri mẽ hkôt ixpa. ⁹ Mỳrapê na prem ijaxà pa arĩ jar ixkrĩ ho ixkrĩ. Na htem ixte amnhĩ tomnuj xwỳnh pyràk o inhĩpêx ně axte ixte Jejus kapêr jarênh o ixpa pymaj ijaxà. Tã ã mẽ kot inhĩpêx anhỹr tã na hte Kris kôt pahtõjaja arĩ ixpãnhã mẽ kām harênh o ri pa. Koja mẽ tee ri kām Jejus jarênh o hapêx prãm kaprỳ. ¹⁰ Jakamã kwār mẽ mãmri ã inhĩpêx aně. Koja mẽ arĩ Jejus kot tanhmã mẽ panê amnhĩ nhĩpêx toja mar o pa nhũm mẽ hkwỳjaja hkôt amnhĩ xunhwỳ ně nhỹrmã pahpyrà ně kêp Jejus Kris kwỳ hã Tĩrtũm mẽ wa kuri mex ně htĩr tũm ně pa ho pa.

Kris kwỳ kot tanhmã amnhĩ tã grer to hã mẽ harênh

11 Na pu htem mẽ pahpê Kris kwỳ hã ã amnhĩ tã pagrer anẽ:

Mẽ kot Kris ã mẽ panhĩmex tã kot puj mẽ akupỹm pahtĩr nẽ kuri pamex nẽ pahtĩr tũm nẽ papa ho papa.

12 Mẽ kot tanhmã Kris ã mẽ pahtomnuj to htã kot puj mẽ arĩ hkôt amnhĩ nhĩpêx o papa rãhã ty nẽ nhỹrmã ãhkô hã mẽ ho amnhĩptãr o papa. Nom kot puj mẽ amnhĩ kamã pakahak pẽ mẽ pahpê Jejus kwỳ hkêt ã amnhĩ jarẽ hã koja Jejus amnhĩ xwar mẽ pahpê hkwỳ hkêt ã mẽ pajarẽ.

13 Nẽ mẽ pahte amnhĩ kaxyw Jejus kôt pajamaxpêr kêê tã tanhmã amnhĩ jarẽnh to xà hkôt tanhmã amnhĩ nhĩpêx to.

Aa kot mẽmoj tã amnhĩ jarẽnh kuhpa hã ri tanhmã amnhĩ nhĩpêx to hkêt. Anẽ.

Mẽ kot Tĩrtũm kapêr o mẽ ahkre mex xwỳnhjê jarẽnh

Wam Pêtre 3.15-16

14 E Ximotre. Ixte ã mẽmoj tã amã karõ anhỹrja kêr ka ho mẽ ahkre rãhã ho ri mẽ hkôt apa. Kê mẽ ama nẽ kãm hamaxpêr rãhã nẽ.

Nẽ mẽ kãm anẽ kê mẽ Tĩrtũm kapêr o mẽ ahkre mex o ri pa nẽ kapêr ã tanhmã axpên mã àkjêr to hkêt nẽ. Kojã mẽ hã axpên mã akir hãmri nẽ amnhĩ to mex kêt nẽ. Hãmri nhũm mẽ kot mẽ kapêr mar xwỳnhjaja ja hã mẽ omu nẽ tee ri Tĩrtũm kapêr kukamã hamaxpêr nẽ hkôt amnhĩ nhĩpêx mex kêt nẽ.

15 Nẽ na htem mẽ kãm mẽ àpênh mex xwỳnhjaja mẽ õ patrãw kapêr ma nẽ hkôt mẽmoj tã àpênh mex nẽ. Nhũm õ patrãwja hwỳr mra nẽ àpênh ã omu.

Hāmri nhūm amnhĩ wỳr omu nē àmnhĩx noo mã apê. Kām àpênh mex jakamã amnhĩ kamã kām uma hkêt nē. Ja pyrà nē kêr ka Tĩrtūm noo mã kām amnhĩ nhĩpêx mex rāhā nē aprĩ hā kapêr o mẽ ahkre mex o ri mẽ hkôt apa. Kê ã ate amnhĩ nhĩpêx anhỹr ã apumu nē anhỹ hā hkĩnh nē. Ka àpênh xwỳnhhta pyrà nē amnhĩ kamã amã uma hkêt nē noo mã kām amnhĩ nhĩpêx mex o ri apa.

¹⁶ No mẽ kot Tĩrtūm kapêr o hêx o mẽ pa xwỳnhjaja kêr ka mẽ hkôt ri apa hkêt nē. Nē mẽ kapêr mar nē ri mẽ hkôt axām hkêt nē. Na htem mẽ kapêr ma nē mẽ hkôt amnhĩ nhĩpêx o pa nē kām Tĩrtūm kapêr mar prām kêt nē. Nē gaa nē te kêp mar pumaj amnhĩ jamak pro pyrāk o amnhĩ nhĩpêx. ¹⁷ Tỳx ri tanhmã mẽ ahkre hto xāja te kot mẽ hkànhy aa mex kêt nē ra omnuj tỳx o mōrja pyrāk. Jao mẽ kot mẽ kapêr mar o mẽ pa xwỳnhjaja mẽ mar pê ra mẽ hkôt amnhĩ tomnuj tỳx o mō. Na hte ra Imēnew mẽ Pijertija wa ã htỳx ri amnhĩ krā hkôt mẽ ahkre anhỹr o pa. ¹⁸ Nē Tĩrtūm o hêx o mẽ hkôt pa nē nhỹrmã akupỹm mẽ pahto mẽ pahtĩr kêt ã harênh o pa. Hāmri nhūm mẽ amnhĩ tã wa kuma nē tee ri amnhĩ kukamã hamaxpêr pê Jejus kaga nē axte amnhĩ kaxyw hkôt hamaxpêr kêt nē. Nom wa kapêrja kot anhỹr kêt. ¹⁹ Kêt Tĩrtūm kapêrja ãm hāmri na. Kot mẽmoj to hêx kêt jakamã na pu htem amnhĩ kaxyw hkôt pajamaxpêr kaprỳ hkêt nē. Kapêr ã kagà htũm kot tanhmã mẽ pahpê hkrajê jarênh to nē harênh kot:

Tĩrtūm na kot hkrajê piitã omunh mex rāhā ho pa xwỳnh.

Anhỹr o mẽ pajarênh. Nē mẽ pamã mẽmoj tã karō

kot:

Kê mẽ kot Jejus kôt amnhĩ xunhwỳr xwỳnhjaja amnhĩ tomnuj o pa hkêt nẽ. Anẽ.

Tĩrtũm krajaja te kệp prat mex pyràk ã mẽ harẽnh

²⁰ Nẽ mẽ hikàxpore rũnh xwỳnhjaja mẽ õ xijere nẽ mẽ õ prat xohtôô. Prat kwỳ muxre nẽ hkwy omnajre. Prat pynajre na htem mãmri kamã apku no prat muxreja ãm mẽmoj mex pix kaxyw na htem mẽsti hã haxwỳ nẽ kamã apku. Kasamêt ã rỳ mẽ hkra krã hkênh ã mẽ hkĩnh nhũm htem mẽsti hã haxwỳ nẽ kamã apku. ²¹ Tã mẽ kot Tĩrtũm kapër o hêx o mẽ pa xwỳnhjê hkôt hamaxpër kêt nẽ mẽ hkôt amnhĩ tomnuj kêt xwỳnhjaja te mẽ kot prat muxre pyràk. Na htem tãm amnhĩ nhĩpêx nẽ tanhmã hamaxpër punuj to ho pa hkêt nẽ. Hãmri nhũm Tĩrtũm ja hã mẽ omu nẽ mẽ ÿ hã hkĩnh nẽ. Hãmri nẽ te mẽ kot prat muxre jaxwỳr nẽ kamã apkur pyrã nẽ mẽ kot kãm tanhmã amnhĩ nhĩpêx to ho pa kaxyw mẽ unhwỳ.

Mẽ pahte tãm amnhĩ nhĩpêx ã mẽ pamã karõ

²² Nẽ mẽ àptàr nyw jamaxpër punujja kêr ka te ate hamỳnh nẽ amnhĩ katut kôt rênh par pyràk o hipêx Ximotre. Jao axte ho ajamaxpër o ri apa hkêt nẽ. Nom mẽ hamaxpër mexja kêr ka hamỳ nẽ amnhĩ krã him hagiê nẽ ho ajamaxpër rãhã ho ri apa. Jao tãm amnhĩ nhĩpêx nẽ amnhĩ kaxyw Tĩrtũm kôt ajamaxpër rãhã nẽ. Nẽ amã mẽ kệp Kris kôt akwỳjê hkĩnh pê tanhmã mẽ ho ajuta hto ho ri mẽ hkôt apa. Jao mẽmoj to mẽ kutã anojarêt rãhã nẽ. Na hte ã Pahihti Jejus kôt amnhĩ nhĩpêx xwỳnhjaja amnhĩ nhĩpêx anhỹr o pa.

23 Ně kêr ka mẽ kot htỳx ri amnhĩ krã hkôt mẽ ahkre ho mẽ pa xwỳnhjê hkôt apa hkêt nẽ. Te ate mẽ kêp awry hã ri apa pyrà nẽ mẽ kapêr ma nẽ ãm ama. Na htem mẽ kapêr mar o pa nẽ ra hã axpẽn mã tanhmã àkjêr to ho pa. Jakamã kwarĩ mẽ hkôt ri apa hkêt nẽ. 24 Mẽ pahte Tĩrtũm mã amnhĩ nhĩpêx o papa xwỳnhjaja na pu htem mẽ kurom mẽmoj tã axpẽn mã paxàkjêr o ri papa hkêt nẽ. Na pu htem ãm mẽ piitã mẽ kamã paxukapri pẽ mẽ ho mex nẽ mẽ kamã pagryk tokyx anhỹr kêt nẽ. Nẽ Tĩrtũm kapêr o mẽ ahkre mex nẽ. Na hte ã mẽ pahte Tĩrtũm mã tanhmã amnhĩ nhĩpêx to xwỳnhjaja amnhĩ nhĩpêx o papa anẽ.

25-26 Jakamã koja mẽhõ ate Tĩrtũm kapêr o mẽ ahkreja ma nẽ tanhmã ho amã kapêr to ka ama nẽ amnhĩ tã tanhmã kãm akapêr punuj to hkêt nẽ. ãm kamã axukapri ho tanhmã hã kãm akapêr mex to. Na hte Satanasti te kot amnhĩm mẽ unẽnh pyrãk o mẽ hipêx nẽ tanhmã mẽ kãm Tĩrtũm kapêr o hẽx to nhũm mẽ kuma nẽ hkôt hamaxpêr nẽ kapêr kôt amnhĩ nhĩpêx. Tã kot kaj mẽ kamã axukapri ho mẽ kãm akapêr mex nẽ nhũm Tĩrtũm tanhmã mẽ hkrã hto nhũm mẽ ama nẽ hkôt amnhĩ xunhwỳr japêr. Te Tĩrtũm kot Satanasti pẽ amnhĩm mẽ utàr pyrãk. Jakamã nhũm mẽ hpãnhã Tĩrtũm kapêr mex ã harẽ nẽ harẽnh o:

—Nà pêr ãm hãmri na Tĩrtũm kapêrja. ãm mex o mex. Anẽ.

3

Jejus akupỳn wrỳk kukamã mẽ kot amnhĩ tomnuj xwỳnhjê jarẽnh

Matêwre 24.4-13; Korosẽ 2.16-19; Wam Ximotre

4.1-5; Sikũn Pêtre 2.1-3; Jutre 3-16

¹ Nê Jejus akupÿn mẽ pahwÿr wrÿk xwÿj ri mẽ kot tanhmã amnhĩ nhĩpêx toja kot paj hpãnhã ixprĩ hã amã harẽ ka inhmar tÿx nê Ximotre. Koja Jejus akupÿn mẽ pahwÿr nojarêt pu mẽ pahpê hkwyjaja pahpunuj nê papa. ² Nê Kris kwÿ hkêť xwÿnhjaja koja mẽ amnhĩ pix kukamã hamaxpêr o pa.

Jao hikàxpore rax o pikuprõnh pix kukamã hamaxpêr pê hkwyjê pê õxÿ htÿx o pa.

Nê mẽmoj tã amnhĩ to jarkrar o pa.

Nê tanhmã hkwyjê japrÿ hto ho pa.

Nê mẽ hipêêxà nê mẽ katorxà hã hpijaàm kêt o pa.

Nê Tĩrtũm ã hpijaàm kêt o pa.

Nhũm mẽhõ tanhmã mẽ ho mex to nhũm mẽ amnhĩ tã mẽ omu nê ãm mẽ omu nê amnhĩ tã tanhmã mẽ kãm nê hkêť nê. Rÿ mẽ kãm: “Nà ãm hãmri na ka ã ixto mex anê. Nà ja mex.” Anhÿr o mẽ kãm kapêr kêt nê.

³ Mẽ ukaprĩ hkêť jakamã koja mẽhõ tanhmã mẽ homnuj to nhũm amnhĩ tã mẽ omu nê kamã gryk kurê kumrêx nê aa gryk o hapêx kêt nê.

Nê amnhĩ tã tanhmã hkwyjê ho hêx to ho pa.

Nê htÿx ri kãm hprãm xà hkôť tanhmã amnhĩ tomnuj to.

Nê oprê ho pijapu pix kukamã hamaxpêr.

Nê axtem nê kãm mẽmoj mex pumunh prãm rÿ mẽmoj mex mar prãm kêt nê.

⁴ Nê mẽhõ ho hkrãmnhwÿ htã axtem nê mẽ kãm mẽ hkurê xwÿnhjê nhĩhkram haxà.

Nê hamaxpêr mex kêt o tanhmã amnhĩ tomnuj to rãhã ho ri pa.

Ně amnhĩ to rũnh o mẽ piitã mẽ hakrenh par ã amnhĩ to jarkrar o ri pa.

Ně amnhĩ krã hkôt kãm amnhĩ nhĩpêx prãm xà hkôt amnhĩ nhĩpêx o pa ně kãm Tĩrtũm kãm prãm xà hkôt amnhĩ nhĩpêx prãm kêt ně.

⁵ Hãmri ně mẽ kêp hkra hã amnhĩ jarênh o pa htã aa hkôt amnhĩ nhĩpêx kêt. ã Tĩrtũm kra hkêt xwỳnhjaja amnhĩ nhĩpêx kot anhỹr jakamã kwa kêt ka ã mẽ hkôt apa hkêt ně Ximotre.

⁶⁻⁷ Na htem hêx rom hkwỳjê nhõrkwỹ hwỳr agjê ně kamã tanhmã mēnijê mã hêx to. Mẽ kot mẽ mar ně tanhmã amnhĩ tomnuj to hãmri ně ja hã amnhĩ pumu ně tee ri amnhĩ kukamã hamaxpêr kaxyw. Ně mẽ kãm mẽ kapêr nyw mar prãm tã nhãm mẽ kapêr ma ně nhãm mẽ kapêr mar ně aa Tĩrtũm kapêr mar ně amnhĩ kaxyw hkôt hamaxpêr kêt ně. Jakamã nhũm mẽ kot amnhĩ tomnuj xwỳnhjaja hêx rom mẽ hwỳr mra ně mẽ õrkwỹ hwỳr agjê ně tanhmã mẽ kãm mẽmoj to hêx to. ⁸ Te kot amnepê m finat Jãnre mẽ finat Jãmtija wa kot amnhĩ nhĩpêxta pyrãk. Na pre finat Mojestija Tĩrtũm nhỹ hã tanhmã mẽ ahkre hto ho pa nhũm Jãnre mẽ Jãmti wa kãm mar prãm kêt ně. Ně tanhmã ja né hkwỳjê mã kapêr to ho pa. Tã ã mẽ kot amnhĩ tomnuj anhỹr o mẽ pa xwỳnhjaja na htem wa urãk ně kãm Tĩrtũm kapêr mar prãm kêt ně kapêr nê tanhmã hkwỳjê mã kapêr to ho pa. Nhũm mẽ hamaxpêr mex kêt jakamã ãm mẽmoj punuj pix kukamã hamaxpêr ně mẽ kuma ně amnhĩ kaxyw Jejus kôt hamaxpêr kêt ně. ⁹ Tã nom koja mẽ hkwỳjaja tokyx hprĩ hã mẽ kot mẽmoj to hêx ã mẽ omu hãmri ně axte mẽ hkôt hamaxpêr kêt ně nhũm

mě rĩ amnhĩ pumu. Te amnepêm mẽ kot hprĩ hã Jãnre mẽ Jãmti wa kot tanhmã amnhĩ tomnuj to hã wa omunhta pyræk.

Mě pahte Jejus ã pahpunuj tã hkaga hkêt ã mẽ pamã karõ

Atre 13.50–14.7, 14.19–22

¹⁰ E Ximotre. Ate ixkôt apa ryy jakamã ra ate tanhmã ixte amnhĩ nhĩpêx ho ixpa hã ixpumunh mex.

Ixte tanhmã Tĩrtũm kapër o mẽ ahkre hto ho ixpaja.

Ně inhmã mẽmoj to anhỹr prãm xwýnhja.

Ně ixte amnhĩ kaxyw Kris kôt ijamaxpërja.

Ně inhgryk tokyx anhỹr kêtja.

Ně ixte tanhmã Kris kôt ixkwýjê ho mex to ho ri ixpaja.

Ně ixpunuj ně ixpa htã arĩ Kris kôt amnhĩ nhĩpêx mex o ixpaja.

Ã ixte amnhĩ nhĩpêx anhỹr o ixpaja ate ixpumunh mex.

¹¹ Na pa pre krĩ pê ãxiok ně Ikõn ně Ristija kamã mẽ kãm Jejus jarěnh o ixpa nhũm mẽ hkwyjaja Jejus ã tanhmã inhĩpêx to pa amnhĩ xà htýx kamã ijamak o ri mẽ hkôt ixpa. Tã nhũm Pahihti Kris xatã mẽ kêp ixpytã pa ixtĩr pê mẽ ãhkra rũm ijapõx o ixpa. ¹² Na hte Kris kwý hkêt xwýnhjaja mẽ pahte Kris kôt amnhĩ nhĩpêx o papa hã mẽ pahtomnuj o pa.

¹³ Ně mẽ kot Tĩrtũm kapër o hêx o mẽ pa xwýnhjaja koja arĩ mẽ kêp Kris kwý hã amnhĩ to hêx pê mẽ nokupyr. Ně mẽ kãm Tĩrtũm kapër o hêx o pa. Jao ra mẽ tãmjaja amnhĩ nokupyr o pa ně amnhĩ tomnuj týt kumrẽx.

Pawre kot tanhmã Tĩrtũm kapẽr ã kagà jarẽnh to Rõmãn 15.4; Sikũn Pẽtre 1.19-21

¹⁴⁻¹⁵ No ka Ximotre. Amnepẽm aprĩre rũm na pa pre mẽ ixohtõ nẽ Tĩrtũm kapẽr o ajahkre ho ixpa. Akatorxã nẽ anhõ wõwõre nẽ pa nẽ Kris kwýjaja pa prem ho ajahkre rãhã ho akõt ixpa ka mẽ inhmar tỳx nẽ amnhĩ kaxyw Jejus kõt ajamaxpẽr. Jakamã kwa kêr ka arĩ hkõt ajamaxpẽr mex rãhã ho ri apa. Tĩrtũm kapẽrja na htem mar pê amnhĩ kaxyw Jejus Kris kõt hamaxpẽr nẽ hkõt amnhĩ xunhwý nhũm Tĩrtũm ja hã mẽ omunh xã hkõt mẽ ho hkra. ¹⁶ Tĩrtũm kapẽr ã kagàja Tĩrtũm kapẽr na. Na htem ho mẽ ahkre ho pa. Koja mẽhõ hkwým ri tanhmã amnhĩ tomnuj to nẽ kapẽr ma nẽ tee ri amnhĩ tomnujja kukamã hamaxpẽr o ra hkaprĩ nẽ. Rỳ tanhmã amnhĩ tomnuj to htã kapẽr ã kagà kamã kapẽr nẽ Tĩrtũm kot ã kot amnhĩ tomnuj anhỹrja nẽ mẽ pamã kapẽr ã harẽnh ma nẽ amnhĩ tomnujta kaga kurê kumrẽx. Rỳ kamã kapẽr nẽ Tĩrtũm kot tanhmã mẽ pahte amnhĩ to mex to hã mẽ pamã karõ kamã harẽ nẽ kuma. Hãmri nẽ ý hã hkõt amnhĩ nhĩpêx mex rãhã nẽ. ã na hte Tĩrtũm kapẽr kagàja mẽ kot mar nẽ hkõt amnhĩ nhĩpêx xwýnhjê ho mex anẽ. ¹⁷ Na hte mẽ kot Tĩrtũm mã amnhĩ nhĩpêx o mẽ pa xwýnhjaja kamã harẽ nẽ hkõt amnhĩ nhĩpêx mex pê mẽ piitã mẽ ho mex nẽ ho mẽ ahkre mex rãhã ho pa.

4

Pawre kot mẽmoj tã Ximotre mã karõ Korosẽ 4.5-6

¹ Nẽ koja nhỹrmã Jejus Krisja akupỹn mẽ pahwýr wrý hãmri nẽ mẽ pahpiitã tanhmã mẽ pajarẽnh to.

Ra mẽ htyk xwýnhjaja nẽ arĩ mẽ pahtĩr xwýnhjaja nhũm tanhmã mẽ pahte amnhĩ nhĩpêx to ho papa hã mẽ pahpumunh kôt tanhmã mẽ pajarênh to. Jao Tĩrtũm mẽ wa kuri mẽ pahtĩr tũm nẽ papa ho papa hã mẽ pajarê rỳ wa kuri pahtĩr tũm nẽ papa hkêt ã mẽ pajarê. Jakamã kwa Ximotre kot paj Tĩrtũm mẽ Jesus Krisja wa noo mã mẽmoj tã amã karõ ka inhmar tỳx nẽ. ²⁻⁴ Koja nhỹrmã mẽ kệp Tĩrtũm kra hkêt xwýnhjaja axte kãm Tĩrtũm kapêr mar prãm kêt nẽ nhãm mẽ kapêr pix mar prãm o ri pa. Jao amnhĩ kukamã hamaxpêr o:

—Nà inhmã Tĩrtũm kapêr mar prãm kêt. Kot mẽmoj piitã nê mẽ hkurê kênã. Kot paj hpãnhã mẽhõ kot mẽmoj nê mẽ hkurê hkêt xwýnhjê kapêr pix mar o ri ixpa. Nà kot paj anẽ. Ja na inhmã hprãm. Nom kot paj axte Tĩrtũm kapêr mar kêt nẽ.

Anhỹr jao kapêr kaga nẽ hpãnhã htỳx ri nhãm mẽ ujarênh pix ma nẽ hkôt hamaxpêr. Koja mẽ ã amnhĩ nhĩpêx anhỹr o pa. Jakamã kwa kêt ka arĩ mẽ kãm Jesus kot tanhmã mẽ panê amnhĩ nhĩpêx to hã harênh rãhã ho ri mẽ hkôt apa Ximotre. Mẽ kãm mar prãm kêt tã mãmri ri mẽ kãm harê. Nẽ nhỹri mẽhõ pumu nẽ kãm harê. Mẽ kãm mar prãm xwýnhjê mã harê nẽ mẽ kãm mar prãm kêt xwýnhjaja ka mãânên mẽ kãm harê. Nhũm mẽhõ tanhmã amnhĩ tomnuj to ka hã omu nẽ tanhmã nê kãm akapêr to kê hkaga tokyx anẽ nẽ akupỳm tãm amnhĩ nhĩpêx. Rỳ nhũm mẽhõ tãm amnhĩ nhĩpêx o pa ka ja hã omu nẽ hã kãm akapêr nẽ kãm:

—Ăm hãmri na ka hte Tĩrtũm kôt amnhĩ nhĩpêx mex nẽ. Anẽ.

Hãmri nẽ anojarêt kêt kãm mẽ kãm Tĩrtũm kapêr o mẽ ahkre rãhã ho ri apa. ⁵ Nẽ tãm ri amnhĩ

nhĩpêx rãhã nê. Mê kot Jejus ã tanhmã anhiĩpêx to htã kêr ka ÿ hã amnhĩ to htÿx nê arĩ mẽ kãm kapêr jarênh o ri mẽ hkôt apa. Jao Tĩrtũm mã amnhĩ nhĩpêx mex rãhã nê. Kêr ka ã mẽ hkôt amnhĩ nhĩpêx anhÿr o ri apa Ximotre.

*Pawre kot ra htyk kaxyw ã amnhĩ jarênh
Atre 20.17-35*

⁶ Nê mẽ kot ixpĩr xà hã arĩgroja ra hwÿr ahtêp o mõi. Kot paj pêr tokyx ty. Amnepê m na prem Tĩrtũm mã mẽmoj nhõr kaxyw nê mẽ hkõm xà kamã mẽmo kagõja py nê mẽ kot Tĩrtũm mã mẽmoj nhõr xà hã mêtija ã hkapĩr pa nhũm hapêx. Tã te ixpê mẽ hkõm xà kamã mẽmo kagõ pikapĩrta pyrãk. Kot paj tokyx ty nê jar ijapêx. ⁷ Na pa ra Pahihti Jejus mã amnhĩ nhĩpêx mex o ri ixpa. Mê kot tanhmã hã ixtomnuj to htã pa hkaga hkêt nê arĩ hkôt amnhĩ nhĩpêx mex rãhã ra ixtyk kaxyw. ⁸ Ixte Pahihti kãm hprãm xà hkôt amnhĩ nhĩpêx mex o ri ixpa jakamã koja amnhĩ tã tanhmã ixto mex to. Nom papxipix ixto mex kêt nê. Na hte ãm hãmri tãm mẽ pahpiitã mẽ panhiĩpêx. Jakamã nhÿrmã kot mẽ piitã tanhmã mẽ harênh to xà hã arĩgrota ã koja mẽ pahkĩnh pê mẽ pahte amnhĩ wÿr kamã pajamak o papa xwÿnh piitã mẽ pamã mã mẽmoj mex gõi.

Pawre kot amnhĩ wÿr Ximotre hwÿr

⁹ Kwa na pa ra ato ijamak tÿx nê Ximotre. Kwa kêr ka amnhĩm anojarêt nê tokyx tanhmã amnhĩ to hpa nê man ixwÿr mõi.

¹⁰ Na pre ra Kresêx ma Karatas wÿr mõi nhũm Xitre ma pika pê Tawmas wÿr mõi. Nhũm Tẽmti ra tanhmã hamaxpêr to nê àpênh gryk ã ixkaga nê

ma akupÿm Tesarõn wÿr mõ. ¹¹ ãm Rukre pix na arĩ ixkõt pa jakamã kêr ka anojarêt hãmri nẽ ahte amõr kêt nẽ. Makre mã anẽ kê man akõt ixwÿr mõ nẽ tanhmã ixto ajuta hto ho pa.

¹² Nẽ Xikitre na pa pre ra Epes wÿr kumẽ.

¹³ Nẽ Torõt kãm Kapti nhõrkwÿ kamã ixte kry pê inhõ kamĩs pa hkà ryti rer jakamã kêr ka anojarêt nẽ inhmã apy nẽ man inhmã o mõ. Nẽ inhõ kagàta ka mãänën inhmã amÿ nẽ o mõ. Nẽ mẽmo mry kà hã ixte mẽmoj tã kagàta ka mãänën apy nẽ mãn inhmã o mõ. E kêr ka anojarêt nẽ ixkukrêxja jamÿ nẽ ixwÿr ho mõ.

Tanhmã Aresãnti kot Pawre nhĩpêx to hã harênh

¹⁴⁻¹⁵ Nẽ na pre kàx o mẽmoj nhĩpêx xwÿnh Aresãntija ixtomnuj nẽ. Pa pre mẽ kãm Tĩrtũm kapêr o mẽ ahkre ho ri mẽ hkõt ixpa nhũm tee ri inhma nẽ kãm mar prãm kêt nẽ. Hãmri nẽ ixkutã amnhĩ xãm nẽ inhĩpêx kati nẽ. Nom koja Pahihti Jejus ixtã tanhmã ho. Kwa kêr ka amnhĩ nẽ omunh mex nẽ Ximotre.

Pahihti Jejus kot Pawre mã hamaxpêr o hihtÿx ã harênh

¹⁶ Nẽ pahi kot mẽ mar xà hã ixkre kamã wam ixte mẽ kãm amnhĩ jarênh ta ã na pre mẽhõ ixyr pê mẽ kãm tanhmã ijarênh to hkêt nẽ. Na prem piitã mẽ umaj ixkaga hpa. Nom kwãr mẽ mãmrĩ ã amnhĩ nhĩpêx anẽ. Tĩrtũm kot ixtã tanhmã mẽ hoja na inhmã hprãm kêt. ¹⁷ ãm Pahihti Jejusja pix na pre mẽ kurom ixkaga hkêt nẽ. Na pre ixto ixihtÿx nẽ pa ÿ hã mẽ kãm tanhmã mẽ panê kot amnhĩ nhĩpêx to hã harênh pa. Nhũm Ijaew kêt xwÿnh kot inhmar o hkrĩ xwÿnhjaja ixujarênh mar o hkrĩ

nhũm Tĩrtũm inhnê tanhmã mẽ ho nhũm mẽ ixpĩr kêt nẽ. ¹⁸ Koja Pahihti mẽ kutã ixto ixihyt̃x rãhã nẽ mẽmo arĩgro hã amnhĩ w̃yr ixto api. Pa Tĩrtũm mẽ wa kuri inhmex kumrẽx nẽ ixtĩr tũm nẽ ixpa ho ixpa. Pahihti mex o mex jakamã kêr pu mẽ kãm mex o mex ã harẽnh rãhã ho papa nẽ aa jam panhũrer kêt nẽ.

Pawre kot tanhmã hkrãmnhwỳjê jarẽnh to

¹⁹ Nẽ kêr ka Prisire mẽ mjên Akir wa kãm ijarẽ. Nẽ Onẽsipti hprõ nẽ hkrajaja ka mããnẽn mẽ kãm ijarẽ. ²⁰ No Eras kormã Korĩt kãm pa. Nẽ Toropti na pre à nẽ pa Mĩrêt kãm kure nhũm ixkõt mõr kêt nẽ.

²¹ Kwa kêr ka amnhĩm anojarêt nẽ amgrà pẽ man tokyx ixw̃yr mõ Ximotre.

Nẽ ota Epti mẽ Prutẽhti mẽ Rĩnre mẽ Krawreja aw̃yr hpẽr mẽ. Nẽ jar Kris kõt pahkwỳjê piitã aw̃yr hpẽr mẽ.

²² E kê Pahihti Jejus ato mex rãhã nẽ mẽ apiitã mẽ akutã nojarêt rãhã ho pa.

Tã ãm ja pix. Ixpê Pawre na pa aw̃yr kagàja nhĩpêx nẽ kumẽ.

Tĩrtũm kapēr ã kagà nyw **New Testament in Apinayé (BR:apn:Apinayé)**

copyright © 1999 Wycliffe Bible Translators, Inc.

Language: Apinayé

Translation by: Wycliffe Bible Translators, Inc.

Apinayé [apn], Brazil

Copyright Information

© 1999, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Apinayé

© 1999, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 11 Nov 2022 from source files
dated 29 Jan 2022

383a4e22-34cd-505f-9cc2-2f9921e7aa9f